

BONDIMÁ YE AZALI NZAMBE



Pe Elobi boye.

Pe Eliya Motisibi, oyo azalaki . . . kofanda na Gileade, alobaki na Akaba, Lokola Yawe Nzambe ya Yisalaele azali na bomoi, oyo natelemi liboso na ye, mamwe to mbula ezala te na mibu misato oyo, bobele na liloba na ngai.

Pe liloba na Yawe eyelaki ye ete,

Longwa awa, pe kende na ngámbo ya esti, pe omibomba na pembeni na mokele ya Kerite—Kerite, (nalingaki koloba) oyo ezali na esti ya Yaladene.

Pe ekosalema ete okomela mai ya mokele; pe nasili kopesa biyanganga mitindo ete báleisaka . . .

Boye, akendaki pe asalaki ndenge Yawe alobaki: mpo akendaki kofanda na pembeni na mokele ya Kerite oyo ezali na esti ya Yaladene.

Pe biyanganga ezalaki komemela ye lipa ná mosuni na ntongo pe lipa ná mosuni na mpokwa; pe azalaki komela mai ya mokele.

Pe esalemaki nsima na mwa ntango ete mokele yango ekaukaki, mpo mbula enokaki te na mabelé.

Pe liloba ya Yawe eyaki epai na ye ete,

Telema pe kende na Sarepta ya Sidone, fanda kuna: tala, nasili kopesa mitindo na mwasi-mokufeli-mobali moko ete áleisaka yo.

Bongo, atelemaki pe akendaki na Sarepta. Pe ntango akómaki na ekuke ya engumba, tala, mwasi-mokufeli-mobali yango azalaki wana pe azalaki kolokota nkoni: pe abengaki ye, pe alobaki, Yela ngai mwa mai na mbeki ete námela.

Pe ntango abandaki kokende kozua yango, abengaki ye, pe alobaki, Yela ngai mwa lipa na loboko na yo.

Pe alobaki, Lokola Yawe Nzambe na yo azali na bomoi, nazali na gató te, bobele mwa faríni kati na mbeki pe mwa mafuta kati na molangi: pe, tala, nazali kolokota nkoni mibale, mpo nákota pe nálamba yango mpo na ngai pe mpo na mwana na ngai ya mobali, tokolia yango pe tokokufa.

Bongo Eliya alobaki na ye, Kobanga te; kende kosala ndenge olobi: kasi, na yango, salela ngai naino mwa gató, pe memela ngai yango, bongo na nsima sala mpo na yo pe . . . mwana na yo.

Mpo yango elobi Yawe Nzambe ya Yisalaele, Mbeki ya farini ekosila te, pe molangi ya mafuta ekokauka te, kino mokolo Yawe akotinda mbula na mabelé.

Pe akotaki pe asalaki ndenge Elisa alobaki: pe mwasi, ná ye, ná ndako ya mwasi, baliaki mikolo mingi.

Mbeki ya farini esilaki te, pe molangi ya mafuta ekaukaki te, kokokana liloba ya Yawe, oyo elobamaki na Eliya.

Mpo na liteya ya ntongo ya lelo, liboso nákende mboka ya bapaya, naponi litangi moko, oyo: *Bondimá Ye Azali Nzambe.*

² Pe sikawa, Nkolo, pambola Liloba na Yo wana Ekoteyama, pe tika Molimo Mosantu ákanga milimo na biso pe makanisi na biso, pe ábongisa biso mpo na kozala na Ye elongo, mpo tosengi Ye koya. Mpo toyaka na ndako ya Nkolo te mpo bámona biso, to mpo tómonana, kasi mpo na koyekola Yo, koyeba lolenge na Yo, pe nzela na Yo, pe ba-ntina na Yo, mpo tókoka kotelema liboso na makambo ya bomoi, na elikia ya solo, wana tondimi ete Ye azali Nzambe. Pesa biso yango, Nkolo. Tosengi yango na Nkombo na Yesu. Amen.

³ Ezalaki mpenza ntongo moko ya nsomo. Molunge pe putulu ezalaki mingi, bato bazalaki na balabala, na nzala, pe mabelé ezalaki na móto mingi pene na kozika. Nyonso wana ezalaki kotalisa masumu na bango pe kokweyisama ya bomoto na bango.

⁴ Bomoni, Akaba azalaki na bokonzi na—na Yisalaele na eleko yango, to likolo na Yisalaele, pe alekaki bakonzi nyonso ya Yisalaele na nkanza. Liboso na ye, mokonzi ya nkanza lokola ye azalaki te, mpo ye, atako alakisamaki pe ayebaki makambo malamú, akobaki na ye kozanga kosepelisa Nzambe na nyonso azalaki kosala. Atako ye azalaki na ebongiseli monene ya mampinga, pe bato bakómaki na bozui mingi na ntango ya bokonzi na ye, kasi, ata bongo, okoki kolonga ntango molai te soki ozali kosepelisa Nzambe te.

⁵ Lisusu, mpo na libala na ye, na esika ábala kati na bato na ye moko, akendeki kobala mosumuki, mosambeli bikeko, oyo azalaki kosambela bikeko. Abalaki Yezabele. Pe ye azalaki mondimi te.

⁶ Pe mondimi asengeli kobala mozangi kondima te, ata ndenge nini. Basengeli ntango nyonso kobala bandimi.

⁷ Kasi Akaba asalaki likambo moko ya mabe. Na ntembe te, Yezabele azalaki mwasi kitoko. Pe akweisamaki na kitoko na ye, esika na oyo ye azalaki. Ezali likambo bato mingi basalaka libunga yango moko kino lelo.

⁸ Pe akotisaki losambo ya bikeko na ekólo, kati na libota. Pe libota, banganganzambe, batei na bango, bakweisamaki na bosenga monene ya ebele na bato.

⁹ Ezali kotalisa mpenza ekólo na biso lelo. Tokweisami na bosenga ya ebele na bato. Na ntembe te banganzambe bakanisaki ekosala na yango eloko te, lokola bakonzi ya mboka bandimaki yango. Kasi ata bakonzi ya mboka bandimi likambo, tosengeli na likambo oyo Nzambe andimi. Pe bato bakanisaki ekosala eloko moko te soki bakei liboso na makambo na bango ya mokili.

¹⁰ Bongo bokoki kotuna ngai nálimbola likambo nauti koloba, ete ezalaki kotalisa mpenza lolenge ya lelo. Tokoki kokanisa ete tozali basambeli bikeko te, kasi ezali bongo. Pe bakonzi ya mboka bandimi yango. Lelo bato bakómi basambeli bikeko, mpo ba—basambelaka bikeko. Bamosusu basambelaka bavedéte ya cinemá, lokola bikeko. Bamosusu basambelaka mbongo, lokola bikeko. Pe bamosusu basambelaka bavedéte ya televizió, lokola bikeko. Kasi eloko nyonso ozali kotia liboso ya Nzambe ezali ekeko, ézala eloko nini.

¹¹ Ata Satana, moyini na biso monene, azali na mayele mabe mingi, na lolenge ete atiaka, mbala mingi, lingomba liboso ya Nzambe. Bokoki kozala na lingomba monene. Ekoki kozala ndako ya losambo monene, to ekoki kozala ebongiseli monene. Pe, lisusu, ekoki kozala losambo monene, kasi kotika eloko ata moko te kozala liboso ya Nzambe, na motema na yo. Eloko nyonso etiami—liboso na Nzambe, ezali ekeko.

¹² Pe bato yango bayebaki ete bazalaki lisusu na molimo te, ndenge bazaláká, na ntango ya bakonzi mosusu. Pe bakómaki kokanisa, lokola bazalaki ekólo ya basambeli, nyonso ekotambola malamú. Ndenge moko pe biso tokómi wana.

¹³ Eleki mwa basanza nazalaki kosolola na moninga na ngai mpenza. Alobaki: “Ndeko Branham, namoni yo oyokelaka Etats-Unis oyo mawa ata moke te.” Alobaki: “Ogangelaka masumu ntango nyonso pe olobaka ete Nzambe akopesa bitumbu na ekólo oyo.”

¹⁴ Nalobaki: “Asengeli kosala bongo, mpo na kozala sembo.”

Alobaki: “Kasi, Ndeko Branham, obosanaka ete ekólo oyo etongámá likolo ya Makomi. Bankoko na biso bayaki awa, pe Nzambe nde apésá biso libula oyo. Pe tozali ekólo ya basambeli.”

¹⁵ Nalobaki: “Ya solo, nyonso wana. Pe moto moko te ayebi ndenge nasepelaka na ekólo oyo! Kasi, yoka, ndeko na ngai, Yisalaele eponamaki pe na Nzambe, Atindelaki bango basakoli pe bato minene. Kasi Nzambe alingaka lisumu te. Asalaki ete Yisalaele ábuka mbuma moko na moko oyo alonaki. Bongo soki Asalaki ete Yisalaele ábuka oyo alonaki, Akosala pe ete tóbuka oyo toloni. Aponaka bilongi te.”

¹⁶ Pe tokómi kokanisa ete lokola topemi likolo na oyo bankoko na biso basálá, to likolo na babandisi minene ya mangomba na biso, likolo na mbeka monene oyo bapesaki na Nzambe, yango ezali malamú pe tosepelaka na yango mingi, kasi tokoki kozua

lobiko te uta na oyo bango basalaki! Lobiko ezali likambo ya moto ye moko kati na moto ná Nzambe. Ná ekólo te, ná lingomba na biso te, kasi biso moko liboso na Nzambe, tokosamba.

¹⁷ Ekómi, na ekólo na biso, ata kati na bato ya molimo koleka oyo tozali na bango, okei epai ya mibali pe basi ya molimo, okomona na mitema na bango ete eloko moko ezali kozanga.

¹⁸ Tozalaki, na ba-mpóso euti koleka, nazalaki koluka koyeba makambo mosusu oyo, pe namoni ete kati na bato oyo nazalaki kokanisa ete bazalaki mpenza likonzi, kasi namonaki ete bazalaki kolobela mingi likolo ya biloko ya mokili, bakendaka bipai na bipai pe balobaka: “Nzambe apesi ngai eloko *boye na boye* oyo eleki monene. Nzambe apesi . . .” Bozali koloba solo te.

¹⁹ Biloko minene ya mokili ezalaka ntango nyonso mokano ya Nzambe te. Nzambe anokisaka mbula likolo na bato malamumu pe bato mabe. Kasi oyo mokili esengeli na yango lelo ezali kondima ya lokuta te, mpo na koluka komikosa na eloko moko pe kobenga yango eloko ya molimo.

²⁰ Mbala mingi kondima esalaka bikamwa ya minene, kasi euti na yango na motema ya molimo te. Nkolo na biso Alobaki te ete? “Bato mingi bakoya epai na Ngai, na mokolo wana, pe bakoloba: ‘Nasalaki *boye na boye*, na Nkombo na Yo te?’ Pe Nakoloba na bango polele: ‘Bólongwa pene na Ngai, bino basali ya masumu na nko.’” Lisumu na nko ezali nini? Ezali ntango oyebi kosala likambo ya malamumu kasi osali yango te. Akoloba: “Nayebi bino ata moke te.” Pe tozali kobika na mokolo yango.

²¹ Oyo tosengeli na yango lelo ezali te biloko ya mokili mingi. Tozali na yango. Tozali na mposa ya mangomba ya minene koleka te. Tozali na mposa ya ba-losambo ya minene koleka te. Tozali na mposa ya kobakisa baemisió ya radio pe ya televizió te. Tozali na mposa ya kobakisa biloko nyonso wana te. Kasi oyo tosengeli na yango lelo, mpo na kozala bato ya molimo, ezali bato oyo bakomikitisa liboso na Nzambe, ézala bazangi loméya, pe bakobondela kino molimo oyo ezali kati na bango ésepela na bolamu ya Nzambe, pe kolamuka esalema na mitema na bango, pe ebongola ezaleli pe lolenge bazali kobika na yango.

²² Okoki kozanga sapato na makolo, okoki kolata bilamba epasuka, kasi eloko moko na motema na yo ezali koyemba banzembo ya Nzambe. Malamumu názala na yango na esika ya kozala na mbongo nyonso ya mokili.

²³ Boye okoki koloba te ete biloko ya mokili etalisaka ntango nyonso mapamboli ya Nzambe. Dawidi alobaki bongo na Yawe, ete amonaki bato mabe koumela . . . lokola nzete ya mobesu. Kasi Nzambe atunaki ye: “Otalaki ye malamumu na suka?” Ata tolati bilamba ya kitoko ndenge nini, ata tozali na bilei ndenge nini, yango ekendaka Liboso na Nzambe te. Nzoto oyo tofandi kati na yango, epolaka, ata tosaleli yango ndenge nini. Kasi bomoto

ya kati oyo ezali kati ya moto; lolenge ya molimo nde ekendaka Liboso na Nzambe.

²⁴ Kasi tokanisaka makambo na biso ezali kotambola malamau. Tokanisaka lokola tozali ekólo. . . Akaba ná Yisalaele mobimba, na eleko wana, bakanisaki pe ete makambo na bango ezalaki kotambola malamau. Banganganzambe ná batei na bango bazalaki koyebisa bango: “Nyonso ezali malamau. Nyonso ezali na yango malamau.” Kasi bazalaki na moto moko, azalaki kopamela makambo ya mabe, mpo ye ayebaki ete Nzambe ya bulee akokaki kosepela te na makambo ya mikolo wana ya losambo ya bapakano.

²⁵ Ndenge moko pe, Nzambe ya Lola azali ndenge moko lelo. Makasi na biso nyonso pe makambo minene oyo tomekaka kosala, Nzambe akosepela ata moke te, kozanga bomoi oyo ebulisami mobimba liboso na Ye.

²⁶ Tokoki kotonga biteyelo, bisika ya komibulisa pe mingombo. Tokoki kosala bibongiseli. Tokoki kosala makambo minene, kasi Nzambe akosepela te soki bomoto ya kati ya moto ebulisami te likolo na etumbelo ya Nzambe, pe emipesi te na misala ya Nzambe. Kasi esalemaka lisusu te.

²⁷ Mayangani na biso ya mabondeli ekómá na bolembu, pene na miniti moko kaka ya libondeli, mbala moko na mbeto. Tomonaka yango kosalema mbala moko to mibale na mokolo. Wana, biso nyonso tokweisami. Bomoto ya ekólo na biso ekwei. Tozali na ba-Billy Graham ná ba-Oral Roberts bipai nyonso. Kasi esengeli mposa éya na motema ya Amerika, ya kozongisa yango epai ya Nzambe na bomoi, na lobiko oyo ezali na bomoi, na kondima oyo ekufaka te kati na Nzambe na bomoi. Tozali kosala makasi ya mpamba, tóloba.

²⁸ Tokoki kotambola wana tovimbisi tólo, ná ba-kingo ya bilamba etálá na sima, kotambola na balabala, pe kolinga bábenga biso “Molakisi” to “Mo-e-limemia.” Tokoki kozala bakengeli ya ba-losambo eleki minene na ekólo, pe tokoki kozala basantu mpenza, kino moto moko te akoki kotalisa mabe moko na bomoi na biso. Kasi esengeli bomoto ya kati, oyo ezali na kati na biso, épela móto mpo na Nzambe, esengeli eloko moko kuna na kati, éyoka mposa na Ye! “Lokola nganji ayokaka mposa makasi ya mikele ya mai, molimo na ngai ezali na mposa na Yo, E Nzambe.” Esengeli tókóma na lobiko ya lolenge wana!

²⁹ Yango wana, komunizme ná nyonso wana, ekokoba kolonga lokola sikawa, pe masangá nyonso tokoki kosala ekopekisa yango ata moke te. Elobámá liboso ete ekoya. Kasi Nzambe azali kobenga Lingomba na Ye.

³⁰ Mwasi yango asengelaki kozala na mosanda ya Eliya! Mpo, mbala mingi misala na yo etalisaka oyo yo ozali. Pe, lisusu, aponamáká mpo na koyamba mosakoli ya Nzambe. Bóbosana te, azalaki mwasi ya Mabota, Moyuda te.

31 Pe mabelé ezalaki na móto. Pe na ntembe te mwasi yango, lokola azalaki na mosanda wana, lokola azalaki mondimi. . . Mpo tomoni ete Nzambe akokaki kobenga ye te, soki abongaki te mpo na koyamba mosakoli ya Nzambe. Mpo Akokaki kotinda mosakoli na Ye te na ndako oyo ebongi te.

32 Ezalaki kopona na ye te. Ezalaki kopona ya Nzambe. Ye nde abengisaki ye te; Nzambe nde abengisaki ye. Atiamaki liboso pembeni na mokele. Biyanganga bazalaki koleisa ye. Kasi ezalaki motindo ya Nzambe mpo likambo moko ésalema. Pe na ntembe te Nzambe akendaki epai na mondimi ya lolenge moko na Eliya.

33 Azalaki mokufeli-mobali. Pe biso nyonso toyebi oyo mwasi yango, mokufeli-mobali, akokaki kobikela, wana mobali na ye akufaki pe asengelaki kobokola mwana na ye ya mobali.

34 Pe na bituka wana, bazalaki kobika na mbuma ya bilanga na bango. Bazalaki na miango te lokola biso lelo, pe—pe mandoki minene te mpo na komibatela. Bazalaki kobika na mbuma ya bilanga na bango. Pe lokola masumu ya bato, pe kobeba ya bomoto na bango ememaki bokauki na mboka, bango nyonso bakómaki na nzala pe bazalaki kokufa.

35 Lisusu tomoni ete, na ntembe te, azalaki kosambela mikolo nyonso na butu, butu mobimba, ntango abandaki komona faríni na kati ya mbeki kokita, kokita, kokita. Kino na ntango moko faríni oyo etikalaki na mbeki ekokaki lisusu ata kopo moko te. Atikalaki bobele na mwa moke mpenza. Liwa ekotaki na lopango, ekómaki na ekuke. Makoki ya kobakisa mosusu ezalaki te. Ekólo mobimba ezalaki kokufa na nzala.

36 Pe, mafuta, etikalaki bobele lutu moko na kati ya molangi. Bobele mafuta moke wana ná faríni moke wana nde ezalaki kokabola ye na liwa. Na ntembe te akómaki na bosembo mingi na mabondeli na ye. Soki yango ebeti ndako na yo, bosembo ekomata mwa moke koleka oyo tozali na yango na ntongo oyo, soki toyebi ete liwa ekómi na ekuke.

37 Pe nabanzi, mbala mosusu, tokoki kokanisa, ntango mosusu, boye, ete abondelaki butu mobimba, mpo atikalaki bobele na mokolo moko. Azalaki kotala bibebú ya mpembe ya mwana na ye ya mobali ya mibu soko misato to minei. Pe azalaki komona mikuwa na ye moko kolemba moke moke, wana mosuni ezalaki kokabwana na yango. Ezalaki mpenza likambo ya nsomo, mpo na mama yango, komona makambo yango. Pe, ata bongo, ná maboko na ye liboso na Nzambe, azalaki kobondela butu moi: “Sikawa, totikali bobele na loboko moko ya faríni ná lutu moko ya mafuta.”

38 Boyebi, ezali likambo ya kokamwa. Tika ete Nzambe ákotisa yango mpenza kati na moko na moko na bino, soki bokoyoka ngai lisusu koteya te. Tika ete oyo ézala nsango. Ezali likambo ya

kokamwa, kokamwa mpenza, ete mbala mingi Nzambe asalaka makambo ndenge wana.

³⁹ Boyebi, soki toyamboli masumu na biso pe tokokisi nyonso oyo Nzambe asengi. . . Tondimeli Nzambe. Makambo mosusu tokutanaka na yango, ezalaka kokokana na mokano na Ye. Toyamboli masumu na biso, pe tobongisi mabe nyonso oyo tosalaki, tosali nyonso oyo tokokaki kosala. Nyonso oyo Nzambe asalaki, to asengaki, tokokisi bosenga yango, kasi Afandi kaka kimia. Aboyi mpenza koyanola biso.

⁴⁰ Nayebi malamau ete nazali koloba na bato oyo, na ntongo oyo, bazali koleka na makambo yango. Naleká na yango, mbala mingi, ngai moko pe. Ntango nazongaka sima pe nalandelaka bomoi na ngai pe nabalolaka libanga moko na moko, soki namoni ete nasalaki likambo moko ya mabe, nakendeke koyambola yango pe koloba: “Nkolo Nzambe, nakobongisa yango,” pe nakendeke kosala yango. Na sima nazongi pe nalobi: “Sikawa, Nkolo, Ozali Nzambe; Okoyanola ngai. Ya solo nakokisi nyonso oyo Osengi ete násala. Pe bosenga nyonso, nakokisi yango.” Kasi Alingi kaka koningana te, lokola Afandi kimia, na ntango wana nde osengeli koyeba malamau ete Azali Nzambe. Kolemba nzoto te. Likambo bobele moko ezali ete, na motema na yo, óndima ete Ye azali Nzambe.

⁴¹ Liteya na ngai. Ndima naino, liboso ósala likambo. Ndima, na motema na yo, ete ezali Nzambe. Pe ntango okokisi nyonso oyo Asengi, pe oyebi malamau ete Azali Nzambe, na ntango wana kondima ebandaka kosala, kaka wana. Kondima eteleme ngwi, mpo eyebi ete Ye azali.

⁴² Pe okokisi bosenga nyonso. Ondimi ete Ye azali, pe kondima eteleme ngwi. Oh, Nkombo na Ye épambolama! Kondima ekoningana te, mpo eyebi malamau ete Nzambe azali, pe Ayanolaka baoyo nyonso balukaka Ye na mposa makasi.

⁴³ Likambo oyo ézinda mpenza pe bóbosana yango ata mokolo moko te, Branham Tabernacle. Soki okokisi bosenga ya Nzambe, pe na motema na yo ondimi ete Ye azali, Nzambe azali bobele komeka kondima na yo, mpo Alingaka kosala bongo. Oyamboli masumu na yo pe okokisi nyonso oyo Nzambe asengi, kasi Afandi kaka kimia, kobosana te, kondima elobi ete Ye azali. Lisusu, kondima ekangani makasi na yango, eyebi likambo yango te, kasi eyebi ete Ye azali, pe endimi ete Ye azali.

⁴⁴ Lisusu, bobosana te, soki Ye azali, Maloba na Ye esengeli kozala solo. Pe soki Asengaki ete óleka na makambo yango, pe oleki wana, Atindami kotosa Liloba na Ye. Kozonga sima te, mpo na koloba: “Oh, nabikisami na ngai te. Ngai. . .” Oh, yo kondima ya moke, elembá. Kondima yango te. Soki nyonso eyambolami, pe nyonso ebimi, pe okokisi bosenga ya Nzambe, kondima ekotelema ngwi. Eloko moko te ekoningisa yango. Ye azali, pe oyebi yango malamau. “Baoyo batalelaka Yawe bakoza makasi

ya sika; bakomata likolo ná mapapu ya mpongo. Bakopota mbangu pe bakolemba te; soki batamboli, bakolemba te.”

⁴⁵ Bozelaka, soki bokokisi bosenga na Ye. Ememaka kondima na bino na etumba. Soki okokisi. . . bosenga ya Nzambe esalemi, to ekokisami, otosi yango na mobimba, pe osali nyonso oyo Nzambe asengi ete ósala, na ntango wana kondima na yo ekopema wana, ete Ye azali. Bondima Ye azali Nzambe.

⁴⁶ Boyebi, Alingaka komeka biso. Alingaka komona soki kondima na bino ekosala nini. Boyebaki yango? Nzambe alingaka komona ndenge bokosala. Soki olobi: “O Nkolo, nandimeli Yo. Yo nde Mobikisi na ngai. Nandimi ete Ozali Mobikisi na bokono; nandimi ete Yo nde Opesaka Molimo Mosantu. Pe biloko oyo nasengeli na yango, Yo nde Nzambe oyo apesaka yango.” Na sima ntango oyamboli masumu na yo nyonso pe olaki Nzambe makambo okosala soki obikisami, bongo, soki esalemi te, okimi lokola goigoi esika moko. Nzambe akoki kosalela yango te. Lolenge Asalela yo ezali te. Lolenge Áyanola yo ezali te, mpo Ayanolaka bobele na kondima. Bongo, na mbala moko, okei na yo, pe Akoki koyanola te. Kasi kondima ya solosolo ekotelema wana, eyebi malamumu ete Nzambe azali. Bondima ete Ye azali.

⁴⁷ Pe soki Nzambe asengi likambo boye ésalema, óyambola masumu na yo, pe bongo na bongo, pe osali yango, kondima elobi ete Ye azali, na ntembe te ekosalema. Bosenga na yo esengeli kozua eyano. Oh, na—nabanzi bokobosana yango te. Soki ondimi Nzambe, Nzambe andimi Liloba na Ye. Azali bobele kozela ete ámeke yo.

Asálá yango mbala mingi. Tótala ndakisa moko to mibale.

⁴⁸ Tókanisa bana ya Baébele. Basengelaki kofukamela ekeko te. Nzambe atielaki bango motema. Pe ntango bayokaki ete basengelaki kokende na litumbu na móto, balobaki: “Nzambe na biso azali na makoki ya kokangola biso na litumbu yango. Kasi ata Asali yango te, tokofukamela ekeko na bino ata moko te.” Bomoni, bayebaki malamumu pe bandimaki Nzambe.

⁴⁹ Bayebaki ete Azali Jehovah. Bayebaki ete Ayanolaka mabondeli. Kasi mpo na bango, Ásala, Ásala te, elingaki kozala mpo na bolamu. Boye balobaki bobele litatoli na bango, bayambolaki masumu na bango, pe bakendeki kokota na kufa.

⁵⁰ Ntango bazalaki kokende na litumbu na móto, koyeba ete bandimaki ete, soki Nzambe atiki bango bázika, Alingaki kosekwisa bango, na lisekwa. Bandimaki Nzambe, mpo bayebaki ete Nzambe alingaki kotambwisa makambo nyonso mpo na bolamu na bango. Pe ntango tondimi Nzambe, toyebi ete Nzambe akotambwisa makambo nyonso mpo na bolamu na biso.

⁵¹ Boye, balobaki bobele litatoli moko. Bandimaki, pe bakendeki mbala moko na litumbu na móto. Pe Nzambe atikaki

bango bákota kuna; Afandaki, Azalaki kotala bango. Alingaki nde Ámona soki bakosala nini.

⁵² Ntango, mokonzi alobaki: “Bofukamaki ntango kelelo eyulaki?”

Balobaki: “Te. Tofukamaki te.” Kondima yango wana, etelemi ngwi.

“Ee, boye, soki bofukamaki te, boyebi mobeko na ngai.”

“Iyo, toyebi mobeko na yo.”

“Mobeko na ngai elobi ete bakotokisa móto ya litumbu mbala nsambo koleka ndenge ezalaka, pe nakobwaka bino kuna na kati. Bolingi sikawa kofukama?”

“Te. Tokofukama te.” Bótala kondima na bango.

⁵³ Nzambe alobaki: “Ee, Nakotala soki bakosala nini mpo na yango. Nakotala soki kondima na bango ekosala nini.”

⁵⁴ Bongo alobaki: “Bókanga bango maboko, pe bókanga bango makolo, pe bómema bango na litumbu.” Pe bapusanaki na litumbu, ná móto na bilongi na bango. Nzambe atelemaki, Azalaki kotala. Kasi bandimaki ete Ye azali Nzambe. Basilaki koyambola. Basilaki kobongisa nyonso, oyo bayebaki. Bandimaki ete Ye azali Nzambe.

⁵⁵ Bongo bakendaki mbala moko na litumbu na móto. Pe na miníti ya suka mpenza, Ayaki longwa na likolo, na likalo ya mopepe, ezalaki kopepa bango mpo na kolongola mputulú, wana Azalaki kobondisa bango pe kosolola na bango.

⁵⁶ Nzambe atikaka kondima na bino ékóma na esika oyo esengeli kosala.

⁵⁷ Mokolo moko Yobo, ya Kondimana na Kala, ntango Satana, mofundi na biso, afundaki ye ete asalaki lisumu na nkuku. Kasi Yobo ayebaki ete asalaki lisumu te. Ayebaki ete asilaki koyambola nyonso oyo asalaki, pe kopesa mbeka ya kotumba. Yango nde Nzambe azalaki kosenga. Bobele yango nde Nzambe azalaki kosenga, kopesa mbeka ya kotumba pe koyambola. Pe Yobo asalaki yango.

⁵⁸ Satana alobaki: “Nakozua bakaméla na ye, mpo azali mozui. Nakozua bampate na ye.” Na suka azuaki bana na ye, ya motema mpenza.

⁵⁹ Kasi, Yobo aninganaki ata moke te, mpo ayebaki ete Nzambe, ee, andimaki ete Ye azali Nzambe, mpo asololaki na Ye, pe akokisaki bosenga na Ye. Amitalaki pe amonaki, “Napesi mbeka ya kotumba nyonso. Namilobelaki na motema: ‘Mbala mosusu ntango bana na ngai ya mibali basalisaki fe—feti, pe bana na ngai ya basi bazalaki kuna, mbala mosusu basalaki masumu na nkuku na mitema na bango, boye nátumbela bango mbeka mpo na koyambola mabe na bango.’”

⁶⁰ O, Nzambe! Soki moto atosi oyo Nzambe atindi ye kosala, andimi ete Azali Nzambe, Asengeli koyanola. Kondima ebengaka Ye na mosala, mbala nyonso.

⁶¹ Ntango osali oyo oyebi ete ezali malamumu, ntango okokisi bosenga na Ye, ntango oyamboli pe obongisi makambo, pe ozongisi biloko ya bato, pe otiki yango liboso na Nzambe. Ata Afandi kimia ndenge nini, Azali kaka Nzambe, Azali kozela ete kondima yango ékoma wana. Osali misala na yo, sikawa Alingi Ámona kondima na yo na nzela ya misala na yo. Alingi Ámona soki okosala nini.

⁶² Soki bapakoli yo mafuta pe babondeli mpo na yo, Nzambe azali kozela ete Ámona oyo ekondima mpo na yango. Ezali te oyei noki awa lomongo ekolanda, pe okimi mokolo elandi, mpo mobikisi mosusu aleki na engumba. Azali kozela mpo Ámona soki kondima na yo ekosala nini. Ezali te ózonga sima, mokolo elandi, pe óloba: “Nazali kobela makasi, nandimi te ete nabikisamaki.” Na yango, obongi na yo te mpo na molongo ya mabondeli. Obongi te. Obongi te. Obelemini naino te. Ondimi te ete Ye azali Nzambe. Ngai. . .

⁶³ Okoki koloba: “Ndeko Branham, nandimi makambo na yo te.” Misala na yo moko etalisaka oyo ozali. “Bokoyeba bango na mbuma na bango.” Soki moto alobi azali Moklisto; kasi azali naino komela masanga, ná makaya, pe kobeta masano ya mbongo, koloba maseki ya bosoto, pe koloba: “Eteni moko ya Biblia ezali solo, kasi eteni mosusu te.” Akoki koteya Nsango Malamumu, kasi awangani eteni ya Biblia. Azali naino mosumuki. Naino alongobani te.

⁶⁴ Kasi soki otatoli polele ete Nzambe azali Nzambe ndenge moko, pe opesi bomoi na yo na maboko na Ye, kozala, “Nkolo, nazali potopoto; Yo nde Mosali mbeki,” na ntango wana senga eloko ólingi. Kondima ekoningana ata moke te. Ekotelema ngwi.

⁶⁵ Ata makambo emonani lokola ezali kokwea ngámbo na ngámbo, kasi kondima wana ekoningana te, mpo ondimi ete Azali Nzambe. Pe soki Azali Nzambe, Akokisaka bilaka na Ye. Akoki kopesa elaka te bongo Ázanga kokokisa yango. Soki Azali Nzambe, Akokokisa elaka na Ye. Oh, nasepelaka na yango. Asengeli kokangama na yango.

⁶⁶ Yobo apesaki mbeka na ye; asalaki nyonso. Ayebaki ete azalaki na molongo. Pe bandimi ya lingomba bakómaki wana, mangomba mosusu ya bibongiseli, balobaki: “Yobo, ekozala malamumu ótatola ete ozali mosumuki, mpo Nzambe alingaki kotika te ete ózua bitumbu ya boye soki ozali mosumuki te.”

⁶⁷ Kasi Yobo alobaki: “Nayamboli. Napesi Nzambe mbeka ya kotumba, pe nazali mosumuki te.” Ayebaki esika atelemaki. Pe nyonso ekobaki, mpasi na mpasi na mpasi, suka na mpasi mpenza, mpo na kolonga Yobo, pe mpo Yobo áwangana Nzambe pe áwangana mbeka ya kotumba yango. Bobele ntango obandi

kosala likambo, sima na yo koyambola, yango ekotalisa bolembu na yo, ntembe na yo na Nzambe. Soki osengi Nzambe bolimbisi, pe okómi kotia yango ntembe, boye ozali moto na ntembe kasi mondimi te.

68 Yobo ayebaki esika atelemaki, pe atelemaki ngwi na moboko yango.

69 Kokamwa te Pruitt alobaki, na ngonga ya liwa na ye :

Natelemi likolo na Klisto, Libanga ya bileko;
Bisika mosusu nyonso ezali zelo ya potopoto.

70 Likolo ya libanga ya koyambola ya Yobo, ata mwasi na ye molingami atikaki ye. Ntango bokono ebetaki ye, pe kovimba ebimaki ye na nzoto mobimba, akómaki komikwanya pe alakelaki mabe mokolo ya mbotama na ye. Alobaki: “Moi ébima ata te! Sanza ébima pe te na butu.”

Mwasi na ye alobaki: “Yobo, okómi mpenza moto na mawa. Mpo na nini otuki Nzambe te mpo ókufa na yo?”

71 Alobaki: “Ozali koloba lokola mwasi ya liboma.” Andimaki ete Nzambe azali, pe akokisaki bosenga. Oh, namiyoki mosambeli. Ayebaki ete akokisaki bosenga ya Nzambe, pe yango ekati likambo. Nzambe azalaki komeka kondima na ye. Akomeka pe ya yo. Akomeka pe ya ngai.

72 Kasi soki tokokisi bosenga na Ye, “Bóbongola mitema pe moko na moko na bino ázua libatisi na Nkombo na Yesu Klisto mpo na bolimbisi ya masumu na bino, pe bokozua likabo ya Molimo Mosantu,” yango nde elaka na Ye. “Moko kati na bino azali kobela, bóbenga bampaka ya lingomba. Bápakola ye mafuta, pe bábondela. Libondeli ya kondima ekobikisa mobeli, pe Nzambe akotelemisa ye.” Yango ekati likambo. “Bóyambolaka masumu na bino, bamoko na bamosusu, pe bóbondelaka bamoko mpo na bamosusu.” Bokokisi bosenga ya Nzambe.

73 “Bilembo oyo ekolanda baoyo bakondima. Na Nkombo na Ngai bakobengana milimo mabe; bakoloba minoko ya sika; soki basimbi banioka to bameli biloko ekobomaka, ekosala bango eloko te; soki batieli babeli maboko, bakobika.” Yango ekati likambo.

74 Bondima Ye ezali Nzambe. Yeba malamau, na motema na yo, ete ondimi ete ezali Liloba na Nzambe. Yobo andimaki.

Mwasi na ye alobaki: “Mpo na nini otuki Ye te mpo ókufa na yo? Ee, bokono na yo ezali ntango nyonso kokóma makasi koleka.”

75 Satana asepelaka koloba na bino bongo. “Ee, oyoki na yo malamau te koleka ndenge ozalaki liboso bápakola yo mafuta. Oyoki na yo malamau te koleka ndenge ozalaki liboso batei wana bábondela mpo na yo. Kútu, batei yango bazali na libunga.” Yango etali motei wana te. Etali kondima na yo na Nzambe

na bomoi, yango nde ezali na motuya. Etali oyo motei azali te; etali oyo Nzambe azali. Motei apesaki elaka yango te; Nzambe nde apesaki elaka yango. Etali motei te; etali nde Nzambe, ná kondima na yo mpo na kondima ete ezali Nzambe. Boye, bondima ezali Nzambe. Bondima ete ezali Nzambe, pe ezali Liloba na Nzambe. Pe Nzambe azali kati na Liloba na Ye.

⁷⁶ Pe Yobo alobaki: “Ozali koloba lokola mwasi ya liboma.” Alobaki: “Yawe apesaki, pe Yawe azui; Nkombo na Yawe épambolama.” Andimaki ete Nzambe azali.

⁷⁷ Pe ntango atitolaki maloba wana na monoko na ye, nkake ebandaki konguluma pe mikalikali kopelapela. Nzambe abandaki mosala. Yango esalaka ntango nyonso ete Ábanda mosala. Afandi kimia ntango molai.

⁷⁸ Yango nde Azali kosala. Bótala bato ya Amerika oyo, na ntembe te, bakokende na lifelo, basambeli ya lokuta. Nazali na nkanda te. Kasi lisumu epesaka nkanda na moto nyonso oyo azali sembo na Nzambe. Nazali na nkanda ya ekólo te, nazali na nkanda ya bato te, kasi nazali na nkanda ya Zabolo oyo asali makambo oyo mpo na kozipa miso ya bato.

⁷⁹ Bakengeli ná batei oyo bakufa miso bazali kotika bango kosalaka bongo na ntina na mwa likindo na bango bamisalela. Bosengeli kobotama mbotama ya sika. Pe Nzambe abatelaka Liloba na Ye. Bomoni ndenge azali kolalisa bango mpongi. Eleki malamú été bóyeba ete Nzambe azali. “Bazali lokola basantu, kasi bazali koboya Nguya na yango.”

⁸⁰ Mwa mwasi yango, ayebaki ete Azali Nzambe. Ntango mbeki wana ezalaki kokita, kokita, kokita, kokita, makambo ezalaki kobeba se kobeba, ntango nyonso. Kasi Nzambe moto azalaki kotika ete ékóma ndenge wana. Asepelaka mpenza kosala bongo. Alingaka komeka kondima na bino, mpo Ámona soki bokosala nini, Atikaka ete bápakola bino mafuta pe bábondela mpo na bino, na nsima bokono ekómi makasi. Alobaki: “Tala, Satana, meka ye. Nayebi ete andimélá Ngai.” Nzambe ápambolama libela! Oh! la la! [Ndeko Branham abeti maboko mbala mibale—N.D.E.] “Meka ye sikawa. Nayebi ete asila kondima Liloba na Ngai.” Akoki koloba bongo mpo na yo?

⁸¹ Alobaki bongo mpo na Yobo. Alobaki: “Sala ye nyonso olingi, kasi komeka koboma ye te, mpo Nayebi ete alingaka Ngai. Apesi mbeka ya kotumba. Akokisi bosenga. Asali oyo Natindaki ye ete ásalá, pe andimi yango. Sikawa, yitá ye na makala soki olingi.” Abotolaki ye biloko nyonso. Nzambe ayikanisaki yango mbala mibale ntango Azongiselaki ye yango. Ya solo, Akosala yango.

⁸² Amekaka kondima na biso, mpo Ámona soki tondimi mpenza ete Azali Nzambe.

⁸³ Mwa mwasi wana, na ntembe te, alobaki: “Nabondeli. Nabondeli. Nayebi nazali mwasi mpamba ya Mabota.”

⁸⁴ Bobosani te, Yesu alobelaki ye na Bible. Alobaki: “Basi-bakufeli-mibali bazalaki mingi te na eleko ya Eliya? Kasi atindamaki bobele epai na moko, pe azalaki mwasi ya Mabota.”

⁸⁵ “Oh,” alobaki, “Nasengi.” Mbala mosusu, ntango amonaki mwa gató wana ya suka, liwa esilaki kokota na lopango pe ekómaki na ekuke. Soki alei mbala ya suka, ye ná mwana na ye ya mobali balingaki kokufa. Namoni ye kobondela, butu mobimba, mopepe ya molunge ezalaki kopepa, kokausa mabelé, pe bato bazalaki kolela pe koganga na babalabala. Azalaki kotambola na kati ya ndako. Atali mwana na ye. Atali mwa pijamá na ye; ezalaki ya kotoboka, pe makolo na ye ebimaki libanda. Atalaki maboko na ye moko, ebimisaki nzoloko. Atamboli-tamboli, kasi alobaki: “Nayebi ete Azali Nzambe. Nayamboli nyonso. Nasali nyonso oyo Asengaki. Nasengi bomoi na biso, mpo na nkembo na Ye.” Nzambe amonaki ye.

⁸⁶ Bamosusu bazalaki kokende na mabína na esika moko, komiyeisa kitoko, kosala lokola emisio ya televizio to nini, komipesa na bisengo ya mokili. Kasi mwasi yango azalaki ye moko ná Nzambe.

⁸⁷ Ntongo etanaki. Alobaki: “Mwana aleli butu mobimba mpo na nzala. Násala nini ná mwa loboko moko ya faríni oyo?”

⁸⁸ Boyebi, faríni yango ezalaki Klisto. Moyekoli nyonso ya Bible ayebi ete Klisto azalaki Mbeka ya faríni. Pe mbeka ya faríni yango esengelaki pe konikama na libanga ya ndenge mosusu, kino énika mbuma ya lisangu nyonso ndenge moko; mpo Yesu Klisto azali ndenge moko, lobi, lelo, pe libela. Pe mondimi nyonso andimaka bongo pe apemaka likolo na yango. Aleluya! Bózua na bino losambo nyonso ya malili pe ya nkombo ndenge bolingi. Mpo na ngai, nandimi ete Klisto azali ndenge moko lobi, lelo, pe libela. Natelemi ngwi kati na mokili ya baoyo basambelaka te. Nazali kokoba kondima ete Azali ndenge moko lobi, lelo, pe libela.

⁸⁹ Mabanga yango ezalaki konika nyonso ndenge moko, mpo Azali ndenge moko. Azali Nzambe ndenge moko na oyo Azaláká, Azali bongo sikawa, na ntongo oyo. Akozala ntango nyonso ndenge moko. Yango nde ndimbola ya faríni.

⁹⁰ Pe mafuta elingi koloba Molimo, ndenge toyebi kokokana na Ezekiele 4, pe bongo na bongo. Yango wana topakolaka mafuta; ezali Molimo. Ezali nini? Ndenge Yoane 4 elobi: “Tata azali koluka baoyo bakosambela Ye na Molimo pe na Solo.” Yesu azalaki Solo. Azalaki Mbeka ya faríni, pe mafuta yango ezalaki Molimo. Pe Molimo, soki esangisami na Solo, esengeli kopesa eloko moko. Soki osangisi yango, ekopesa gató. Oh!

⁹¹ Kondima na bino ezali wapi? Na ntango oyo Liloba ya Nzambe ezali koteyama na pete na Yango, atako na Nguya na Yango, ete Yesu Klisto azali ndenge moko lobi, lelo, pe libela, pe Liloba ebimi mpo na koluka Faríni, bino bozali na Mafuta ya

kosangisa na Yango. Mbala mosusu ekotondisa bobele lobóko, to lútu, kasi, ata ndenge nini, ezali oyo ya solo.

⁹² Sikawa ebelemi mpo na nini? Ebelemi mpo na ekulusu. Ebelemi mpo na komipesa mbeka. Yango nde bosengeli kosala. Soki Liloba eteyami, pe osangisi esika moko Molimo ná Yango, epesi komipesa mbeka mpo na koboya mpasi nyonso, koboya bokono nyonso, koboya nyonso oyo ekesani na Liloba ya Nzambe, pe kotelema ngwi.

⁹³ Monganga alobi *boye, boye*, na *boye*; ezali na ntina te. Otelemi ngwi likolo na Yango, mpo Nzambe moto alobi bongo. Faríni eyei. Yo ozali na Mafuta. Osangisi Yango.

⁹⁴ Sikawa, nayoki mongongo moko. Ntongo euti kotana. Mongongo moko elobi, elobi: “Kende na elanga pe lokota nkoni mibale.” Bomoni, Makomi elobi “nkoni mibale”? Ekulusu. Azali na faríni ná mafuta, kasi balingi kotinda ye, ásala mosala sikawa; ásala ná yango. Ata soki ozali na nyonso, ozali na Faríni to Mafuta nyonso oyo osengeli na yango, kasi osengeli kosala mosala; komipesa mbeka.

⁹⁵ Nkoni mibale. Na ntango ya kala bayebaki naino lolenge ya malamumu mpo na kopelisa móto te. Soki ozui lokóni pe otii yango likolo na lokóni mosusu, opelisi yango na katikati, okobanda kopusa nkoni yango. Ba-Indien bapelisaka móto ndenge wana. Ngai pe napelísá yango, mbala mingi, epeli butu mobimba. Zua bobele lokoni, pe tia yango *boye*, pe mosusu *boye*, pe koba bobele kopusa yango na móto wana ezali kopela.

⁹⁶ Lokóni yango ezalaki ekulusu. Bible elobi “nkoni mibale”. Mongongo yango elobaki: “Kende na elanga pe lokota nkoni mibale.” Na ntango yango, kuna na ngomba, mongongo ya nkake engulumaki epai na mosakoli pe elobaki: “Kende na engumba. Napesi mitindo.” Oh! la la! Bango mibale batosaki. Likambo moko esengeli kosalema. Bango mibale bazali kotosa.

⁹⁷ Soki motei atei Liloba, pe moto oyo ayambi Yango andimi Yango pe atosi Yango, likambo moko esengeli kosalema. Soki ozali mosumuki, okosengela kobikisama. Soki ozali kobela, okosengela kobikisama, mpo Nzambe alakaki yango, soki tondimi Nzambe.

⁹⁸ Solo mpenza ndenge Azali Nzambe, Asengeli kokokisa Liloba na Ye. Ya solo! Bongo motindo yango elobaki: “Kende na engumba, mpo Napesi mitindo na mwasi-mokufeli-mobali moko.” Emononeli eyelaki mosakoli. Ye wana, azali koya. Ayebi epai azali kokende te; ezali na ntina te. Azali bobele kotosa.

⁹⁹ Mwasi ayebi te nkoni yango ekozala wapi, kasi nkoni mibale ezali na esika moko na elanga. Abandi kotambola. Akei na elanga. Abwaki miso bipai na bipai: “Oh, molunge makasi!” Koganga ya bato uta na engumba, baoyo babimaka na butú bazali kozonga, kotengatenga, wana bazali komela vinio, pe nyonso wana. Abwaki miso na balabala. Amoni eloko te. Amoni

lokóni moko; eteni ya ekulusu, komipesa mbeka. Amoni eteni mosusu, lokóni. Pe ntango alokotaki lokóni oyo ya mibale. . .

¹⁰⁰ Oh, ezalaki mpenza mawa mingi, liwa ekómaki na ekuke. Ye ná mwana na ye ya mobali basengelaki kolia mwa gató moko wana ya masangu pe kokufa. Esili. Pe mbala mingi, na kati ya molili nde toyokaka mongongo.

¹⁰¹ Ntango alokotaki lokóni oyo ya mibale pe abandi kozonga, mongongo moko ekoti na lopango, elobi: “Yela ngai mwa mai na mbeki.”

¹⁰² Abalukaki mpo ámona, ná nkoni mibale na loboko, pe faríni ná mafuta esangisami pe ebelemi. Alobaki ete abongisaki yango, asangisaki yango. Bongo mpenza, Liloba ná Molimo, esengeli kosangana. Kotiama na ekulusu ya komipesa mbeka, mpo na koboya nyonso oyo ekesani na oyo osengi. Ya solo. “Nasangisi yango, sikawa nakei kozua nkoni yango.”

Pe mongongo yango elobaki: “Yela ngai mwa mai ya komela, na mbeki.”

¹⁰³ Atali, pe amoni mobali moko atelemei, ayekemi na ekuke ya lopango, matama ekótá, mandefu, libandi, azali kotala ye uta na balabala, alati mposo ya mpate ya kala. Azalaki lokola mobange moko ya malamú.

¹⁰⁴ Amilobelaki: “Nakokabola mai na ngai na ye.” Mai ya Bomoi, okosepela kopesa yango na moto nyonso, koyebisa moto nyonso, kokende bisika nyonso. “Zela moke, misie.” Abaluki, ná nkoni yango na loboko.

¹⁰⁵ Pe mongongo yango engulumaki lisusu: “Okokabola bobele mai na yo te, kasi yela ngai pe mwa eteni ya lipa na loboko na yo.” Lipa ya bomoi; mai ya bomoi! Ezalaki ya bomoi? Asengelaki kokufa ntango yango elingaki kosila. “Yela ngai mai na yo pe yela ngai lipa na yo.”

¹⁰⁶ Tomoni nini awa? Tokoki kozua liteya nini? “Bólukaka liboso Bokonzi ya Nzambe, pe boyengebene na Ye; biloko mosusu nyonso ekobakisama.”

“Yela ngai mwa mai ná eteni ya lipa.”

¹⁰⁷ Bongo abaluki, kati na mawa na ye. Nakoki koyoka ye koloba: “Misie,” lokola, “okesani na mibali oyo namóná, pe mibali oyo nayokaka koloba. Emonani lokola ozali na elikia na maloba na yo. Kasi nazali bobele na mwa faríni, loboko moko mpamba, ná mwa lutu ya mafuta. Nabongisi yango, pe nakolamba yango na nkoni mibale oyo. Pe nakolia yango, ngai ná mwana na ngai ya mobali, pe tokokufa. Yango nde nyonso oyo nazali na yango.”

¹⁰⁸ Toyoki nini, nsima na yango? “Kasi, yela ngai liboso mwa gató.” Nzambe, liboso. Ata soki moto mosusu alobi nini, eloko mosusu nyonso, ndanga mosusu nyonso, ata soki ezali likambo ya

mawa ndenge nini, ata likambo nini, zua Nzambe, liboso. Liloba na Ye, liboso.

¹⁰⁹ “Monganga alobi nakoki kobika te.” Kasi, Liloba na Ye, liboso. “Nazali mosumuki monene koleka. Nazali mwasi ya ndumba. Nabetaka masano ya mbongo. Nazali molangwi masanga.”

Liloba na Nzambe, liboso. “Ata soki masumu na yo ezali motane lokola ngóla, ekokóma mpembe lokola néje; motane lokola makila, ekokóma mpembe lokola matiti ya mpate.” Liboso, Nzambe.

¹¹⁰ “Kende, yela ngai mwa gató, liboso. Nyonso oyo ozali na yango, yela ngai yango.” Obelemi kopesa yango na maboko na Ye?

¹¹¹ Bomoï na ngai, nyonso oyo ngai nazali. Nazali na mibu ntuku mitano. “Obelemi, William Branham, kopesa Ngai yango? Bobelemi, bino bana mike, kopesa Ngai bomoi na bino? Bobelemi? Bokoki kosala yango, bino babeli? Bokoki kotiela Ngai motema? Bótia Ngai na esika ya liboso.”

¹¹² “Yaka na eteni ya lipa na loboko na yo, pe yela ngai mwa mai.” Atalaki ye. Eloko moko elobaki na ye ete mobali yango ayebaki oyo azalaki kolobela.

Nzambe ayebi bampate na Ye. “Bampate na Ngai bayebi Mongongo na Ngai. Bayebi soki ezali Makomi to te, soki ezali solo to te.”

¹¹³ Abaluki, na botosi. Yango nde bosengeli kosala. Pe ntango abalukaki, mpo na kotosa oyo mosakoli atindaki ye ete ásala, nde nkake eutaki na Likolo, oyo moto nyonso alukaka koyoka. Mpo, nkake moko eutaki na mongongo ya mosakoli, oyo mosumuki nyonso pe mobeli nyonso alukaka koyoka: “YANGO ELOBI NKOLO.”

¹¹⁴ Tolukaka mpenza koyoka Yango! Bato mingi batelemaka na nzela ya ndako na ngai, balobaka: “Kóta awa. Mwana na ngai ya mwasi azali na likambo *boye*. Bebé na ngai, etali mpasi mpenza. Loba bobele liloba yango.” Okoloba yango ndenge nini soki ekómi naino na monoko na yo te? Ekozala yo moko nde olobi. Kasi bazalaka na mposa ya koyoka “YANGO ELOBI NKOLO.”

¹¹⁵ Ekómaki wana, na kati ya lopango, mpo azalaki kotosa. Pe mawa esilaki. “YANGO ELOBI NKOLO. Mbeki ekotikala mpamba te, pe molangi ekokauka te, kino mokolo Yawe Nzambe akotinda mbula na mabelé.” Oh, libondisi mpenza!

¹¹⁶ Alambaki gató yango. Apesaki yango na mosakoli. Azongaki mpo na kolamba mosusu mpo na mwana na ye ya mobali ná ye moko. Baliaki pe bamelaki, batondaki, na mabelé yango.

¹¹⁷ Eutaki wapi? Ekómaki wana ndenge nini? Na ndenge ya science bóyebisa ngai farini yango eutaki wapi. Mafuta yango eutaki wapi? Ekómaki na molangi wana ndenge nini? Akausaki

yango ndenge azalaki kosalela yango, ntongo nyonso. Asilisaki farini na mbeki, ntongo nyonso, pe ekaukaki. Kasi ntango azongaki mpo na kozua yango lisusu, ezalaki wana. Eutaki wapi? Kangaka Nzambe na Liloba na Ye. Ndimba Nzambe. Azali Mokeli.

¹¹⁸ Mbala mosusu obungisá bokolongono bwa nzoto. Mbala mosusu obungisá bondeko. Kanga Ye na Liloba na Ye. Ndimba ete Azali Nzambe. Oyo ezali komonana lokola ntango ya mawa sikawa, mbala mosusu ekozala lisusu ndenge wana te soki ozui Liloba na Ye pe ondima ete Azali Nzambe.

¹¹⁹ Na Allemagne, mokolo moko, namonaki liyemi moko, oyo nakotikala kobosana te. Moyemi moko ya Allemagne ayemaki...liyemi moko oyo—oyo babengaka “Mboka ya Mapatá.” Soki omoni yango, na mwa mosika, ezali kotalisa mpenza mawa ya nsomo oyo omóná naino te. Bobele liboke ya mapatá, soki otali yango na mosika. Kasi soki okómi mpenza pembeni na yango, ebongwani. Ezali nde mapapu ya Banje ezali kobeta elongo, bazali koyembela Nkolo ba-aleluya. Boye, mbala mingi, ezalaka pe na nsomondenge wana. Soki otali yango, na mosika, ekotalisa nsomo pe molili. Kasi kangá Nzambe na Liloba na Ye pe ndima ete Azali Nzambe, pe pusana pembeni na yango, okomona ezali bobele mapapu ya Banje ezali kobeta elongo.

¹²⁰ Mwasi yango azalaki mwa moke lokola Abraham, basengaki ye ápesa nyonso oyo azalaki na yango, átia yango na etumbelo ya mbeka. Mbala mosusu basengi yo pe bongo, na ntongo oyo. Tika banzela na yo. Tika kozanga kondima na yo. Tika nyonso oyo ozali na yango. Na nsima ózua Mafuta ná Liloba, sangisa Yango, pe tia Yango na etumbelo ya komipesa mbeka. Okomona, Ekobenga Nzambe na mosala, kaka ndenge natelemi na eteyelo oyo.

Bokanisa yango wana tozali kobondela.

¹²¹ Ozali na bosenga moko lelo? Ozali na bosenga oyo eleki makasi na yo ya nzoto? Mbongo ozali na yango ezali moke mpo na kofuta mbongo ya ndako? Bana bazali na mposa ya sapato ya sika, kasi ozangi mbongo mpo na kosomba yango? Mbeki etikali mpamba na ndako na yo, pe molangi elingi kokauka? Ozangi makoki ya kosombela bibwele na yo matiti? Pe, wana, likambo moko ezali kotambola te? Kanisa, Ye moto apésá elaka.

¹²² Ozali kobela, pe monganga alobi ete basengeli kopasola yo? Ozangi mbongo mpo na yango? Ozali na bosenga.

¹²³ Ozali mosumuki? Bosenga na yo ezali, oyebi ete soki Nzambe abengi yo, lelo, okobunga? Ozongi nsima pe ozali kokima Nzambe? Pe oyebi osambelaka na lingomba moko, kasi oyebi ete ozali sembo te? Lisosoli na yo moko ezali koloba na yo, kokokana na Liloba, ete ozali sembo te. Pe ozali na bosenga. Kotika te maloba oyo ékweya na esika ya ba-nzube, to likolo ya mabanga,

mitema ya mabanga. Tika ete ékweya na mabelé malamú, oyo ekobotisa.

¹²⁴ Soki ozali kobela pe o . . . monganga alobi okobika te, pe olaki Nzambe ete okosalela Ye mikolo nyonso na bomoi na yo, pe ondimi ete Azali Nzambe, yaka kokokisa bosenga na Ye. Soki ozali na bosenga, okolinga liboso ata kotombola loboko na yo epai na Nzambe, ete ozali na mposa ya eloko moko? Nzambe ápambola bino.

Tóbondela.

¹²⁵ O Nkolo, kaka ndenge nazali na eteyelo oyo na ntongo oyo, nayebi ete loboko moko ekokaki kotombwana te soki Yo oyebaki yango te, mpo Ozali Nzambe. Olobaki: “Batekaka ndeke mike mingi na ntalo moke te? Bino bozali na motuya boni koleka ndeke moke moko?” Koleka boni Omoni maboko na bango, baoyi Mwana na Yo Yesu akufaki mpo na bango! Koleka boni Omoni maboko na bango koleka ndeke moke moko, soki ekwei na ntongo oyo! Nabanzi mpo na . . . ndeke mike zomi na mibale ekoki te kotekama lomeya moko na ntongo oyo, mpo moto te azalaka na mposa na bango. Elingaki kozala kokoso mpo na kosomba bango. Kasi Yo oyebi bango moko na moko; Oyebi lisála moko na moko oyo ezali na nzoto na bango. Oyebi suki moko na moko oyo ezali na motó na biso.

¹²⁶ O Nkolo, yanola libondeli. Sala ete bándima, na ntongo oyo, ete Ozali Nzambe, pe Ezali Molimo na Yo. Tika ete bozito pe lipengwa ya losambo ya mikolo oyo étika bango, ya koloba: “Oh, nasambelaka na losambo *boye*.” Nzambe, tika ete élongwa na makanisi na bango, sikawa. Sikasikawa, tika ete bámona mwa moke Bomoi ya Seko. Boye, bakoluka pe bakoyoka mposa na Yango, ya koyeba oyo Nzambe azali, pe bandimi ete Azali. Akokisaka Liloba na Ye.

¹²⁷ Mpo na basumuki, tika ete bábongola mitema nokinoki, bámilengela mpo na libatizi na Nkombo na Yesu Klisto. Pe Olakaki ete Okopesa bango Molimo Mosantu. Olobaki bongo, Nkolo. Okokisaka bilaka na Yo.

¹²⁸ Soki mondimi moko azonegaki nsima kasi andimi ete Ozali Nzambe, pe abungaki nzela. Tika ete áya lelo, mpo Olobaki: “Ata soki masumu na bino ekómi motane lokola ngola, ekokóma mpembe lokola néje. Soki ekómaki motane lokola makila, ekokóma mpembe lokola matiti ya mpate.”

¹²⁹ Pe soki babeli bazali awa, tika ete báyebe ete Ozali Nzambe. Okokisaka Liloba na Yo. Osengeli kokokisa Liloba na Yo. Wana bamipesi, ná Mafuta na bango, Molimo oyo ezali na kati na bango pe ezali kotatola ete bandimi. Pe, ná Liloba, Lipa ya Bomoi oyo euti kopesama, Klisto; Anikamaki mpo na bango, na Kondimana ya Kala; pe na Kondimana ya Sika, mpo na kotalisa ete Azali ndenge moko lobi, lelo pe libela. Tika ete básangisa Liloba yango ná Mafuta, Molimo, oyo bazali na yango, mpo

bátelema na etumbelo, báloba: “Oyo nde nyonso oyo nazali na yango, Nkolo. Nayei na yango.”

Oh, Okoikanisa yango! Ekobenga Nzambe ya masolo na mosala! Ekosala ete Jehovah, na motema motutami, áloba: “Nazali na mwana oyo atosaka Ngai. Nalekisi ye na momekano, pe atalisi ete alingi Ngai pe andimeli Ngai. Andimi ete Nazali.” Mpo elobámá: “Ye oyo akoya epai na Nzambe asengeli kondima ete Ye azali, pe ete afutaka baoyo balukaka Ye na mposa makasi.” Kokisa yango, na ngonga oyo, wana topesi yango epai na Yo.

¹³⁰ Pe, sikawa, wana togumbi mitó. Pe baoyo bazali na bosenga, ata ya eloko nini, bokoki kotelema, baoyo balingi kotia. . . Sikawa, soki ondimi te ete Azali Nzambe. . . Soki ondimi ete Azali Nzambe, ete Akokokisa elaka na Ye, ya lobiko na molimo, na nzoto, ata nini, soki ondimi ete Azali Nzambe, telema. Soki ozali na moto mosusu oyo olingi kobondela mpo na ye, telema. Soki o—soki ondimi ete Azali Nzambe, talisa bosenga na yo kati na ba-losambo ya basantu. Sala yango wana otelemi. . . [Maloba mazangi na eteni oyo ya bande—N.D.E.]

“Nandimi ete Azali Nzambe. Nandimi ete Akokisaka Liloba na Ye. Pe nayebi malamú ete bosenga na ngai. . . Nakotia yango na nse ya Makila, sikawa.” Soki osali bongo, pesa lisumu nyonso. Lisumu nyonso ezali kozanga kondima. Okoki kozala mondimi ya lingomba, kasi nazali kolobela lisumu, “kozanga kondima na yo.” Opesi yango lokola mbeka. Okopesa yango mbeka. Oyei na ekulusu. Okopesa mbeka, sikawa, kozanga kondima na yo nyonso. Pesa Ye yango, pe yeba ete Azali, pe ondimi ete Akoyanola. Soki ezali bongo mpo na yo, tombola loboko. Tikala ndenge wana.

¹³¹ Nkolo, Ozali Nzambe. Mafuta pe Masangu na bango yango oyo, esangisami. Bazali koya na yango na ekulusu, epai Móto ya Nzambe ekokita na mitema na bango (soki bazali mpenza na eyóngi) mpo na kozikisa mbeka yango. Okosala mosala, okotombola mai oyo ebombami. Okokita longwa na Likolo, na likalo ya Móto. Okoningisa likolo pe mabelé nyonso, mpo na kofuta bango.

¹³² Wana batelemi pe batomboli maboko, kotalisa ete bandimi, pe bamipesi, ná bosenga na bango nyonso, na etumbelo na Yo. E Nzambe ya Likolo pe mabelé, Zúzi ya Likolo pe mabelé, na ntembe te Zúzi ya Likolo pe mabelé akolongisa. Na ntembe te Akokokisa Liloba na Ye, Yo Oyebe mitema ya mibali, mitema ya basi, mitema ya bato oyo.

¹³³ Nkolo Nzambe, ngai pe natomboli loboko, mpo nayebi ete mosala na ngai ya koteya ebongwani sikawa. Pe nandimi ete Ozali. Namóná Yo kotelema kuna kati na Likonzi na Móto. [Ndeko Branham abeti likolo na eteyelo mbala misato—N.D.E.] Namóná Yo kososola makanisi ya mitema ya bato. Okwéyá ata mbala moko te. Olakaki yango ntango Osalaki yango kuna, na

ngámbo ya balabala oyo, ntango Obandaki kosala makambo yango. Pe Obatelaki ngai na mokili mobimba, pe mbala na mbala. Nayebi malamú ete Ozali Nzambe. Nandimi yango mpenza.

¹³⁴ Namipesi ngai moko elongo na bato oyo, pe napesi nyonso oyo nazali na yango mbeka, Nkolo, epai na Yo, mpo na mosala. Nabandi lisusu, Nkolo, kokende mibembo na mokili mobimba. Sunga ngai, E Nzambe. Soki nandimelaki Yo te na ntango moko boye, limbisa masumu na ngai. Limbisi bozangi kondima na ngai. Nayebi ete Ozali, pe ete Ofutaka baoyo balukaka Yo.

¹³⁵ Ndenge moko pe, nayamboli masumu ya bato na ngai, na ntongo oyo, bolembu na bango pe ntembe na bango, wana batelemi pe batomboli maboko. Nayamboli masumu na bango, Nkolo, mpe bolembu na biso nyonso. Tinda Molimo Mosantu likolo na biso, ná elembo ya kondima na Yo, ete Ozali Nzambe. Pe Ozali awa sikawa mpo na koyamba biso, pe komema biso na maboko na Yo, pe kosikola biso na nyonso oyo tobungisaki. Soki ezali bokólóngono biso, ézongisamela biso na mokama. Soki ezali bomoto na biso ya kati, ézongela biso lokola eloko oyo efuluki, ezali kongenga, etondi na Molimo Mosantu, mpo étalisama liboso na Nzambe. Soki ezali kozanga kondima, ézongela biso, Nkolo, ná kondima oyo ekopikola ba-ngomba. Kokisa yango Nkolo.

¹³⁶ Tondimi ete Ozali kosala, Molimo Mosantu azali kotondisa ndako oyo mobimba, likolo na bato oyo, pe na mitema na bango, kotinda bango ete bándima Nzambe na bomoi. Tosali bongo na Nkombo na Yesu Klisto.

Kondima na ngai etomboli miso likolo epai na
Yo,
Yo Mwana na Mpate ya Kalvari,
Nzambe Mobikisi;
Sikawa yoka ngai wana nazali kobondela,
Longola masumu na ngai nyonso,
Kotika te ete nábunga lisusu
Mosika na Yo.

¹³⁷ Ozali na eyongi? Oyambi yango? Tombola loboko, loba: “Nayambi yango sikawa. Nandimi.”

Wana nazali kotambola na esika ya molili,
Pe mawa ezingi ngai,
Zala Mokambi na ngai;
Tinda ete molili ébongwana pole,
Longola nsomo ya mawa,
kotika te ete nábunga lisusu
Mosika na Yo.

Tógumba mitó.


¹³⁸ Nsima na Liteya ya makasi, matata boye; ya mpasi, pe eteyami na mpiko, kasi ezali Solo. Pe soki ondimi na komikitisa

makambo outi kosenga, ete ozui yango, kotika eloko ata moko te ébimisa yo libanda na nzela oyo ya semba. Telema kaka wana. Ata soki natei ndenge nini, nasali nini, to nani asali nini, ekosala eloko moko te soki oyambi yango mpo na yo moko te.

¹³⁹ Ndimá yango na motema mobimba, nyonso oyo ozalaki na mposa na yango. Soki oyamboli masumu na yo, Nzambe alimbisi yo. Kotia yango lisusu ntembe ata moke te. Soki ozongaki nsima na kondima, ozongisami na ntongo oyo. Soki ozali na mposa ya Molimo Mosantu, boye zua libatishi na Nkombo na Yesu Klisto mpo na bolimbisi ya masumu na yo. Yango nde Liloba na Nzambe. Akobongola Yango mpo na lingomba moko te, ebongiseli moko te, to moto mosusu te. Esengeli kozala ndenge wana. Tosengeli kokokisa bosenga oyo ya Ye, bosenga ya lingomba te, bosenga na Ye nde. Yango nde tosengeli kosala.

¹⁴⁰ Alobaki: “Libondeli ya kondima ekobikisa mobeli.” Soki ozali kobela, nauti kobondela libondeli ya kondima mpo na yo. Obondeli yango na motema na yo moko. Ndimá yango, yambá yango, tingámá na yango. Ekosengela kozala ndenge wana. Eloko moko te ekoki kolongola yango, ata soki molili ezali makasi ndenge nini.

¹⁴¹ Olobi: “Ee, ezali lokola nazali kaka kobela.” Ezali te . . . Ezali bobele mapapu ya Banje ekutani. Esili. Ezali nde Nzambe na lolenge ya lipamboli. Ezali lokola molili mpo na yo. Pusana pembeni na yango mwa moke pe tala yango lisusu, ómona soki Nzambe te moto ateleme wana, mpo na kokokisa Liloba na Ye.

¹⁴² Sikawa, wana togumbi mitó, nazongisi liyangani epai ya Ndeko Neville, mokengeli na biso. 

BONDIMÁ YE AZALI NZAMBE LIN59-0125
(Be Certain Of God)

Liteya oyo ya Ndeko William Marrion Branham, eteyamaki liboso na Ngelesa mokolo mwa lomingo na ntongo, mokolo mwa 25, sanza ya yambo na mobu 1959, na Branham Tabernacle, Jeffersonville, Indiana, U.S.A., ekamatamaki uta na bande pe ekomamaki na mobimba na yango na Ngelesa. Ndimbola oyo ya Lingala ekomami pe ekabolami na Voice Of God Recordings.

LINGALA

©2015 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org